

# 1 JON

## JON PĪLĪWUTA KĪTA WAN PAS

### *APMA VAT YINEYA VAK KAT KWILIGA NYANA*

<sup>1-3</sup> Ngwuk kat Jisas Kraist kat mbupmak yigowun. Tamba nat nimba kat mbutnja nyaangit ngwuk kat mbupmat yigowun. Tamba wan nyaangit tindi, ndi kat mbutndi. Kwo nyaangit ana ndi. Jisas Kraist kat nina minimba kwuka vinin. Ndi kat viga kitamba yetinin. Ndi apma vat njimbla njimbla yineya vak kat mbuka kwilinda vak wuka vinin ndi kat. Wan vak mbuka kwilinda vak ndina nyaeknanamba klanda vatna. Wungi kat tiga wan vak ngwuk kat mbutigowun. Mbutiwa nyaangit wutaa ngwutna maawupmba yelavika yetingweyan kita vat yetigiyandin. Nin Godnonala ndina nyan Jisas Kraistnonala kita vat yetiliganin.

<sup>4</sup> Mbutiwa nyaangit wutaa ngwutna maawupmba yelavika yetingweyan nolin ngwandiga solat siweya vat nima vat yigiyandi.

### *GODNA VAK APMA VAK MINA LIGANDI*

<sup>5</sup> Ngwuk kat mbutiwa nyaangit Kraistnanamba klalaa mbupmat yigowun. Wan nyaangit kingiyan. Godna vak apma vak mina ligandi. Kavle vat ana ligandi.

<sup>6</sup> Kita nyan kavle vapmba yetiga liga Godnonala kita vat yetiligowun waa wandeyan woseka waigandi. Woseka waga kavle vat yiga yetigiyandi.

<sup>7</sup> God tiga vla yetindeyan Godna yelangi nimbónala kita vat yetigiyandi. God tiga vla yetindeyan Godna nyan Jisas kwuta njivwa dina kavle vak yiga yetinda vak aywaa silimbwigiyandi.

<sup>8</sup> Kavle vak yetiliga nyan ana wun. Apma vat mina yetiligowun waa kita nyan wandeyan di apma maawut ana yelavika ligandi. Woseka waligandi. Woseka walinda nyaangitmba ndina maawut kavle vat mina yelavika ligandi.

<sup>9</sup> Wun kavle vat mina yiga yetiligowun waa kita nyan God kat wandeyan ndina kavle vak kat God ngwaat siga kwunakiyandi. Ana kwunakiyowun waa God ana wandi. Wan apma vat yigiyandi. Kavle vak kat silimbwigiyandi.

<sup>10</sup> Kavle vat ana yiga yetiligowun waa kita nyan wandeyan God woseka waliga nyana wandeya nyaangit vla ligandi. Wan kavle nyaangit waa nyan God waa nyaangitmba ana waligandi. God waliga nyaangit wan wupma walinda nyaangitna. Ndinyangu aywaa kavle vat mina yetiligandi waa God waligandi.

## 2

### *KRAIST GODNA KIMBUK MAAWUK KAT KWU-NATIGANDI*

<sup>1</sup> Ngwuk wuna apma nyangu ngwuk. Kavle vat yilingwangat kai waa ngwuk kat wan nyaangit piliwutigowun. Ngwutna kita nyan kavle vat yindeyan nimamba ke yelavika lilingweya. Nin kat tiga God kat ngambuliga nyan Jisas Kraist ngiliga. Ndi apma vat mina yiga yetiliga nyana.

<sup>2</sup> Ndi nina kavle vak kat wenga kwiḡa Godna kimbuk maawut kwunatndi. Nina kavle vak kat mina ana kwunatndi. Kipmamba ngepma ngepmamba liga nimbana kavle vak kat aywaa kwunatndi.

<sup>3</sup> Kita nyan Godna si wuka ndina mindama viga tinda vak anda vapmba vigiyadi. Wupma vigiyandi. God waa nyaangitmba yetigiyaa nyan ndi Godna si wuka ndina mindama viga liga nyana.

<sup>4</sup> Godna si wuka ndina mindama viga ligowun waa kita nyan walaa God waa nyaangit kat kai wandeyan wan nyan woseka waliga nyana. Woseka walinja vapmba waligandi.

<sup>5</sup> Kita nyan God waa vapmba yetindeya ndi God kat apma vapmba woviyaguga lindi. God waa vapmba yetindeyan ndi Godnonala kita vat tindangat vigiyandi.

<sup>6</sup> Kita nya Godnonala kita vapmba yetigowun waa walaa Jisas yeta vap vla yetindeyan nglaatndi.

### *KUPI NYAANGITNA*

<sup>7</sup> Wuna apma nimbangwuk kat kapma vat tiga nyaangit ana piliwutigowun. Tamba la nyaangitna piliwutiwa. Tak wan nyaangit wukngwuk.

<sup>8</sup> Ngwuk kat nat samat kupi nyaangitna piliwupmak yiwa. Wan kupi nyaangitmba yetiga tat Jisas yalaa ngwuk kat apma vat yindi. Apma vat yinda vat kulun waa kavamba liga kembanda vak vla ligandi. Nin kat kulun wala la kavle vat tamba ngilivat yigandi. Apma vat tamba yandi.

<sup>9</sup> Kita nyan ndina kita mbaapma nyan kat kai walindeyan ndi kulun waa kavamba yetiliga nyan vla ligandi. Wun apma vapmba yetiligowun waa wandeyan ndi woseka waigandi.

<sup>10</sup> Kita nyan ndina kita mbaapma nyan kat kwunaka woviyaguga lindeyan ndi wan nyan kamba liga kavamba yetiliga nyan vla ligandi. Ndi kavle vak ana yetiliga nyana. Ndinai yetiliga vak wan nat nimba maawut ana kavle yigiyandi.

<sup>11</sup> Kita nyan ndina kita mbaapma nyan kat kai walindeyan ndi kavle maawut yelavika yetiliga nyana. Apma vat yindeya yambi kai. Mini kiya la yetiliga nyan vla ligandi. Apma vat yiga yetindeya yambi kat ana viligandi.

<sup>12-14</sup> Ngwutna nat nimba mat nyangu vla ligangwuk. God Jisas kwutna njivwa vilaa ngwula kavle vat yilingwa vat yilingwa vat silimbwindi. Gwuk God kat viga ligangwuk. Mbambala nglei ngwula maawupmba wan vak klangwuk. Ngwuk kat piliwutigowun. Ngwutna nat nimba nima nimba vla ligangwuk. Tamba la nyan God ndina si wuka ndina mindama viga ligangwuk. Ngwutno ngwuk kat piliwutigowun. Ngwutna nat nimba kwandi nyangu vla ligangwuk. Ngwuk Seten kat kwulakngwuk. Ngwuk kwonduo liga nimba ngwuk. God waa nyaangit ngwula maawupmba ligandi.

<sup>15</sup> Wan kipmamba liga vak kat nimamba ke yelavika yetiga. Kita nyan wan kipmana vak kat nimamba yelavika yetindeyan God kat nimamba ana yelavik kiyandi.

<sup>16</sup> Wan kipmana vat kingiyan. Kavle nda klavat walinja vat. Kavle vat vivat walinja vat. Wun

nima nyan wun wun apma vat yetiga nyan wun waawalinja vat. Wan vak God kwiya vak ana ndi. Kipmana vatna.

<sup>17</sup> Kipmana vat ngini aywaa ngiliga yiga kwo vatnat tigiya ndi. Klavat walinja vat ngini ngiliga yiga kwo vatnat tigiya ndi. Kita nyan God waa vapmba yetindeyan wan nyan njimbla njimbla apma vat tigiya ndi.

### ***KRAIST KAT KAI WALIGA NYANA***

<sup>18</sup> Wuna nyangu, kipmana vat ngiligiya njimbla tamba ngwaya. Kraist kat kai waiga nyana yaiga njimbla tamba ngwaya. Wupma wukngwuk. Mbamala nima sakwat nimba Kraist kat kai waligandi. Ndina vak vilaa kipmana vat ngiligiya njimbla tamba ngwaya waa yelavitigangwuk.

<sup>19</sup> Kraist kat kai waliga nimba tat ninagwinala yetindi. Nina mbaapma nimba ana ndi. Kwo nimba ndi. Nina mbaapma nimba tiga yinjan nin kat ana kagalgedi. Nin kat kwagalanjangat vilaa nina mbaapma nimba ana ndi waa winin.

<sup>20</sup> Gwuk kapma vat tiga nimba ngwuk. Godna waagan ngwuk kat taviga apma maawut kwindi.

<sup>21</sup> Ngwuk Godna vak ana viga ligangwuk waa ana waigowun. Viga ligangwuk. Godna vak woseka waa vak ana ndi waa viga ligangwuk. Wungi kat tiga ngwuk kat piliwutigowun.

<sup>22</sup> Jisas God waa nyan ana ndi Kraist ana ndi waa waliga nyan ndi woseka waliga nyana. Ndi Kraist kat kai waliga nyana. Godnogwi ndina nyan kat kai waliga nyana.

<sup>23</sup> Jisas God waa nyan ana ndi waa kita nyan wandeyanwan nyan Godnonala kita vak ana yetiligandi. Jisas God waa nyana waa kita

nyan wandeyan wan nyan Godnonala kita vat yetiligandi.

<sup>24</sup> Tak wukngwa apma nyaangit ngwutna maawupmba taaga. Wan apma nyaangit ngwula maawupmba lindeyan Godnogwi ndina nyanonala kita vat yetigiyangwuk.

<sup>25</sup> Tak God nin kat wandi. Njimbla njimbla apma vat yetingweya vak gwuk kat kwigiyowun waa wandi God.

<sup>26</sup> Nat nimba ngwutna maawuk kat kavle vat yivat wandi. Ngwutna maawut kwunapmak kat kdinai yetiga vak ke viga waa ngwuk kat piliwutigowun.

<sup>27-28</sup> God dina waagan gwuk kat kwindi, tavilaa ngwula maawupmba ligandi. Wun manda kat ngwula maawuk kat kwunapmak piliwutigowun. Godna waagan ngwula maawuk kat kwunaka gwuk kat apmavat aywaa simagaligandi. Ngwuk kat simagalinda vak woseka wa vak ana ndi. Savagu liga vatna. Ngwuk kat simaganda vapmba ndinogwinala kita vat yeti. Kita vat yetingweyan yaiga njimblamba ngwutna mbangi wup ana yigiyandi. Ndi kat viga an vakiyangwuk.

<sup>29</sup> Jisas Kraist apma vat mina yetilindi. Viga wutigangwuk. Kita nyan apma vat yetiliga ntyan tindeyan Jisas Kraist njanga nyanat tigandi waa viga wutigangwuk.

### 3

#### *GODNA NIMBA*

<sup>1</sup> God nin kat wuna nyangu ngwut wandi, ndina nyanga vla liganin. Nin kat viga woviyaguga lindangat wuna nyangu ngwuk waligandi. Wanda

vak kat ngwuk yelavik ngwula. Tak Jisas yandi, kípmbala la kwo nímba yilinda vak ana víga lindi. Wungi kat tígá mbambala nín ndína yelangí nímba yilína vak ana víga ligandi.

<sup>2</sup> Kita mbaapma nímba, mbambala nín Godna nyangu nín. Ngini tineya vak ana víga liganín. Kita nda mína víga liganín. Kraist yaiga njímbla Kraist tígá vla tígíyanín. Wan njímbla Kraist yilinda vat víga ligíyanín.

<sup>3</sup> Wan yaiga vak kat maawumba yelavíka yetineyan apma maawut yelavíka ligíyanín. Kraist yelavíka líga vla yelavíka liganín.

<sup>4</sup> Kita nya kavle vat yígá yetilindeyan dñi God kat kai walígá nyana. Kavle vat yilínja vak God kat kai walínja vat kita vatna.

<sup>5</sup> Jisas kavle vak yígá yetilínja vak kat kwunapmat yandi. Vilígangwuk. Ndi kavle vak yilígá nyan ana ndi.

<sup>6</sup> Kita nyan Kraistnogwinala kita vat yetindeyan kavle vat ana yígá yetilígíyandi. Kita nyan kavle vat yígá yetilindeyan ndi Godna sí wuka ndína mindama ana víga ligandi. Godna vak ana víga ligandi.

<sup>7</sup> Mat nyangu, ngwutna maawut nat nímba yaa kavle yilandi. Kita nyan apma vat yígá yetilindeyan God ndi kat wunai líga vla lígamín waa waigandi God. Wan nyan Kraist tígá vla líga nyana.

<sup>8</sup> Kavle vat yígá yetilígá nyan ndi Setena nyana. Ndína njambwi nyan Seten tamba la njimblakavle vak mína yígá yetilíndi. Kan njímbla nímibun. Seten yeta kavle vak kat Godna nyan Jisas kwulapmat yandi.

<sup>9</sup> God njanga nyan kavle vat ana yiga yetiligiyandi. Ndi Godna vak ndina maawutmba ngwandilaa ligandi. God ndi kat njanda mandit maawut klandi. Wungi kat tiga kavle vat ana yiga yetiligiyandi.

<sup>10</sup> Yiga yetilinjeya vak kat vilaa siga nagugiyani. Anda nimba Godna nimba. Anda nimba Setenana nimba waa siga nagugiyani. Kavle vat yiga yetiligiyaa nyan Godna nyan ana ndi. Ndina kita mbaapma nyan kat kai waliga nyan ndi Godna nyan ana ndi.

***AWAT SOWAT KWUNAKA WOVIYAGUGA ALI***

<sup>11</sup> Awat sowat kwunaka woviyaguga lineyan apma vala. Wan nyaangit tak wutingwa nyaangitna.

<sup>12</sup> Wupma Ken ya vak vla ke yiga. Ndi kavle nyana. Ndina yakwa ndu kat vatnyandi. Manda kat ndi kat vatnyandi. Ken ndinai yila vat kavle vatna. ndina sambu yila vat apma vatna. Ngi kat tiga nyambwun laataa sambu kat tipmwigwula yiga vatnyandi.

<sup>13</sup> Mbambala kipmamba liga kwo liga nimba kwutingwa njivwa kat kai waa tipmwigwula yiga ligandi. Ngwuk nima sakwat vak ke yelaitiga. Wan vak ndinai ya vatna.

<sup>14</sup> Nin nina kita mbaapma nimba kat kwunaka woviyaguga ligani. Kavle vat yetilinja vak kwagalaa apma vat yetilinja vapmba yetiliganin waa yelavitiganin. Anda vapmba viga yelavitiganin. Kita mbaapma nimba kat woviyaguga linangat viga yelavitiganin. Kita nyan nat nyan kat kwunaka woviyaguga tilapman yindeya dni kavle vat yetiliga nyana.

15 Kita nyan ndina kita mbaapma nimba kat kai wandeyan wan nyan ndu nyan vatnya liga nyan vla ligandi. ndi njimbla njimbla ama vat yetnijeya vak ndina maawupmba ana kwutaa ligandi.

16 Woviyaguga linja vatna angwa kingiyan. Jisas woviyaguga nin kat tiga kiyandi. Ngi kat tiga nat nimba kat kwunapmak tiga kiyaneyan wovuna.

17 Kita nyan nima sakwat do lindi. Ndina kita mbaapma nyan kwanda kwanda nda lapman nyana. Ndi kat kwivak kat kai wandeyan God nin kat woviyaguga linda vamba ana yiligandi.

18 Mat nyangu, nat nimba kat kwunapmak kat kwundimba kwo mbak walanin. Ndi kat kwunak kiyenin.

### *GOD KAT ANA VAAKIYANIN*

19 Nat nyan kat kwunatneyan nin apma vat tiganin waa yelavik kiyenin. God yetina vak kat ana kai waigandi waa yelavik kiyenin.

20 Nina maawut waiga nyaangit min kavle nyan min waa wandeya nyaangik kat ke wuka. God waiga nyaangit mina awut. ndi njambwi nyana. Nina maawutmba liga waiga vat nima vak ana ndi.

21 Nina maawupmba liga kavle nyaagit min kavle nyan min waa walapma yindeyan wovuna. Ngi kat tiga God kat ana vakiyenin.

22 Godnanamba wagalaneya da klaiganin. Ndinai waa nyaangitmba yetiga ndinai yelavika liga vapmba yetineyan wagalaneya nda klaiganin.

23 Ndinai waa nyaangit kingiyan. Godna nyan Jisas Kraist kat gwutna mbangi wiyo waavi taakandeyan wovuna. Awat sowat kwunaka woviyaguga ali ngwula waa wandi God.

<sup>24</sup> Wan nyaangitmba yetineyan Godnogwinala kita vat yetigiyanin. Wan nyaangitmba yetineyan nin kat kwinda waagan nina maawupmba ligiyandi. Godna waagan nina maawupmba lindeyan Godnogwinala kita vat yetina vak viliganin.

## 4

### *ANDA NYAANGIT GOD WAA NYAANGIT. ANDA NYAANGIT KRAIST KAT KAI WALINJA NYAANGIT*

<sup>1</sup> Wuna nyangu, wukngwa nyaangit aywaa ke maawupmba kwutaa yetiga. Wan nyaangit Godna nyaangitna? E? Godna nyaangit ana ndi? Waa maawupmba yelavik ngwula. Nima sakwat nimba kimpamba ligandi. Wun God waa nyaangit kiyaliga nyan wun waa woseka waligandi.

<sup>2</sup> Ngwuk yelavikngwuk. Anda nyaangitna Godna nyaangit. Godna nyan Jisas Kraist yalaa ndinyanguna mbangi klalaa kimpamba lindi waa wanjeyan Godna nyaangitna waa yelavik kiyangwuk.

<sup>3</sup> Kita nyan yandan wan nyaangit ana mbutndi Godna nyaangit ana ndi. Ndina nyaangit Jisas Kraist kat kaiwalinda nyaangitna. Jisas Kraist kat kai walinja vak ngini yaigandi waa wowun gwuk kat. Wan vak mbambala samat tamba yandi.

<sup>4</sup> Mat nyangu ngwuk Godna nyangu ngwuk. Ngwuk Jisas Kraist kat kaiwaliga nimba kat ngwuk kwulak kiyangwuk. Ngwula maawupmba liga nyan nima nyana. Ndina maawupmba liga nyan mat nyana.

<sup>5</sup> Ndi wan kipmana nimba ndi. Ndi kipmana vat mina ngambuligandi. Wan kipmamba liga kwo nimba ndinai waligavat wutigandi.

<sup>6</sup> Nin Godna nimba nin. Godna nimba ninai waliga nyaangit wutindi. Kita nyan ninai waliga vak wutapman yigiyaa nyan Godna nyan ana ndi. Nin yelavik kiyanin. Kandana apma maawut tiga nyan. kandana kavle maawut tiga nyan. Wut-njeya nyaangit wutaa yelavik kiyanin. Ndi kana nyaangitna wutnjeya waa yelavik kiyanin.

### ***GOD WOVIYGUGA NAMWIYA NYANA***

<sup>7</sup> Wuna nyangu, ngwuk awat sowat woviyaguga ali ngwula. Awat sowat woviyaguga lineya vat God kwiya vatna. Kita nyan nat nimba kat woviyaguga lindeyan wan nyan Godna nyana.

<sup>8</sup> Kita nyan nat nimba kat woviyaguga lilapman yindeyan Godna nyan ana ndi. Ndi God woviyaguga yeta vak vla ana yetilindi. God woviyagu namwiya nyana.

<sup>9</sup> Tinda vak nin kat simogwiligandi. God tamba ndina kita nyan kat kipma ay wandi mala ngaga yandi. Apma vat tineya vak simagavat ngaga yandi. God ndi kat ay wandangat nin kat woviyaguga linda vak viliganin.

<sup>10</sup> Nin God kat ana nimamba woviyaguga lingenin. God nin kat nimamba woviyaguga ligandi. Woviyaguga lindangat ndina kavle vak yiga yetinja vak kat wuna kimbuk maawut mina lak yiga kwunak wandi mala ngaga yandi.

<sup>11</sup> Wuna nyangu, God nin kat nimamba woviyaguga lineya vat nglaatndi.

<sup>12</sup> Kita nyan ana God kat viga ligandi. Awat sowat woviyaguga lineyan God nina maawupmba

yetiligandi. God nina maawupmba liga nat nimba kat kwunapmak kat yiliganin ndinai waa nyaangitmba. Waa nyiingitmba.

<sup>13</sup> Anda vapmba Godna yelangimba yiga tineya vak vigiyanin. Anda vapmba God nina maawupmba yalaa tindeya vak vigiyanin. Ndina waagan nin kat kwindi. Ndina waaganwan vak nin kat simogwiligandi.

<sup>14</sup> Kipmamba liga nimba kat kwunapmak kat God ndina nyan kat kwindi. kwindi, yandi mala vinin. Vina vak mbutiganin ngwuk kat.

<sup>15</sup> Jisas Godna nyana waa kita nyan wandeyan God ndina maawupmba yetiligandi. Ndi Godna yelangimba ligandi.

<sup>16</sup> God ya vak vilaa God nin kat woviyaguga linda vak kat viliganin. God nin kat woviyaguga linda vak kat wutaa nina mbangi wiyo waavi laagaligandi. God nin kat woviyagu namwiya nyana. Kita nyan nat nimba kat woviyaguga lindeyan ndi Godnonala kita vat yetiligandi. God ndina maawupmba yetiligandi.

<sup>17</sup> God nina maawupmba liga nina mbangimba lindi, God kat woviyaguga liganin. God tiga vla tiga nimba nin. Ngi kat tiga yaiga nandinya God siga nagugiya nandinyamba God kat ana vakiyandin.

<sup>18</sup> God kat maawupmba yelavika woviyaguga lineyan nina mbangi ana vak vak yigiyandi. God kat woviyaguga lineya vak vatinjeya vak kat kwulatigandi. God wun kat sigiyandi waa waiga nyan ndi vakiyandi. God wun kat woviyaguga ligandi waa waiga nyan ndi ana vakiyandi.

<sup>19</sup> God kat kwo ana woviyaguga liganin. Tat nin kat woviyaguga lindangat tiga awat ndi kat

woviyaguga liganin.

<sup>20</sup> Kita nyan God kat wun woviyaguga ligowun waa walaa ndina wakwa nyan kat kai wandeyan wan nyan woseka waligandi. Ndina yakwa nyan kat ndina mindama kat viiga ligandi. Ndi kat kai waligandi. Mindama vilapman yindeya nyan God wan nyan anda vapmba ndi kat woviyaguga ligandi. Ana alipsiga woviyaguga ligiyandi.

<sup>21</sup> Wawa nyaangit kwo ana waligowun. God wandi, waligowun. God wandi.

Kita nyan wun kat mina ana woviyaguga ligiyandi.

Ndi ndina wakwa nimba kat ndino aywaa woviyaguga ligandi.

waa wandi God.

## 5

### *GOD KAT YELAVITAA KIPMAMBA LIGA VAK KAT KWULAK KIYANIN*

<sup>1</sup> Jisas God njana nyana waa yelavikiyaa nimba ndi Godna nimba ndi. Kita nyan nina nyaek God kat woviyaguga lindeyan Godna nyangu kat aywaa woviyaguga ligiyandi.

<sup>2-3</sup> God kat woviyaguga liga ndinai waa nyaangitmba yetineyan ndina nyangu kat woviyaguga ligiyandin. Kimbik vat kita vap mbit. God kat woviyaguga lineya vat. God waa nyaangitmba yetyineya vak. Bit kita vat bit. God nin kat wagalanda njivwa vali liga njivwa ana ndi.

<sup>4</sup> God njana nimba kipmamba liga kavle vak kat kwulak kiyandi. Jisas Kraist ninagwinala tigandi waa yelavitnjeyan wan kavle vak kat kwulak kiyandi.

<sup>5</sup> Jisas God njana nyana waa kita nyan yelavitndeyan wan nyan kipmamba liga kavle vak kat kwulak kiyandi.

*JISAS GOD NJANA NYANA WAA WALIGA NIMBA*

<sup>6</sup> Jisas Kraist ngaga yalaa ngu yagulaa tiga kiyandi. Ngu mina yaguvat ana yandi. Ngu yagulaa kiyavat yandi.

<sup>7</sup> Jisas God njana nyan tindangat Godna waagan ana woseka waligandi.

<sup>8</sup> Jisas God njana nyana waa mbutikandi kuvut da. Godna waagan mbutikandi. Jisas ngu yagua njimbla nyinangwutmba ligaliga kwundi wandi. Jisas kiyanda njimbla God njana nyanat tindangat vindi. Wundi kuvut nda kita nyaangit mina mbutinkandi. Mandip mandip nyaangit ana mbutikandi.

<sup>9</sup> Kwo nimba waiga vat wutiganin. God waa nyaangit ndina nyaangik kat kwulatigandi. Ngi kat tiga ndina nyaangit wukiyanin. God wandi.

Jisas wunai njana nyana waa wandi.

<sup>10</sup> Kita nyan Jisas kat ndina mbangi wiyo waavi laagandeyan wan nyan Jisas God njana nyana waa maawupmba yelavik kiyandi. Kita nyan God waa nyaangik kat kai wandeyan wan nyan God kat min woseka waligamin waa waliga nyana. Wan nyan God ndina nyan kat walinda nyaangik kat kai wandi.

<sup>11</sup> God waa nyaangit kingiyan.

Wuna nyan kwiwun maa ngwuk kat njimbla njimbla waa wandi God.

<sup>12</sup> Godna nyan kat kwutaa la nimba njimbla njimbla apma vat tindjeya vat klandi. Godna nyan

kat kwutapman la nimba njimbla njimbla apma vat tinjeya vat ana klandi.

*NJIMBLA NJIMBLA APMA VAT YETINEYA VAT KLAMIN WAA YELAVIK KIYANIN*

<sup>13</sup> Ngwuk Jisas God waa nyana waa yelavitiga nimba ngwuk. Ngwuk kat wan pas piliwutigowun. Piliwukwa nyaangit vilaa njimbla njimbla apma vat yetineya vak tamba klanin waa yelavik kiyangwuk.

<sup>14</sup> Godna yelavik vapmba waganeyan ninai waiga vat God wukiyadi. Wutndeyangat nina mbangi ana kilipangi yigiyandi.

<sup>15</sup> Ninai waiga vat wutigandi. Viliganin. Ngi kat tiga waganeya nda kwigiyandi. Viliganin.

<sup>16</sup> Kita nyan ndina kita mbaapma nyan kwo kavle vat yetindeyan wan nyan God kat wagalgiyandi. Wuna kita mbaapma nyan kat kwunak waa wagalgiyandi. Wagandeyan God ndi kat kwunatndi, apma vat tigiyanidi. Nat nimba ana kwo kavle vat yetiligandi. Ndi God kat kai walaa kavle vat yiga yetiligandi. God kat ndi kat manda kat wagalgiyangwuk. Ndi kat ana alipsiga kwunakiyandi.

<sup>17</sup> Kita nyan kavle vat yiga yetindeyan ana nglaatndi. Nat nimba God kat kai walapman kwo kavle vat yiga yetilinjeyan nima glei vat ana ndi. God ndi kat alipsiga kwunak kiyandi.

<sup>18</sup> God njana nimba ana kavle vat yiga yetiligandi. God njana nyan Jisas dina lak kwaligandi. Ngi kat tiga wan kavle nyan Seten ana ndi kat ngway tolala kwutaa ligiyandi.

<sup>19</sup> Nin god njana nimba nin. Wan kipmamba liga kwo nimba kat wan kavle nyan Seten ndi kat kwutaa ligandi.

<sup>20</sup> Godna nyan ngaga yalaa nin kat apma maawut kwindi. Nin kat kwindi maawupmba Godna si wuka ndi kat yelavika liganin. Nin Godnonala kita lulu liganin. Di apma vat tiga nyana. Nin ndina nyan Jisas Kraistonala kita lulu liganin. Ndi ndino apma vat tiga nyana. Jisas Godna. Ndi njimbla njimbla apma vat tinea vak kwiliga nyana.

<sup>21</sup> Mat nyangu, waagan kait kwunatinja vak kwagala ngwula.

**GOD WAA NYAAGIT**  
**The New Testament in the Iatmul Language of Papua**  
**New Guinea**  
**Nupela Testamen long tokples Iatmul long Niugini**

Copyright © 1975 Bible Society of Papua New Guinea

Language: Ngepma Kwundi (Iatmul)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-12-13

---

PDF generated using Haiola and XeLaTeX on 18 Mar 2025 from source files dated 31 Aug 2023

b9b92e46-2e7b-584e-a145-60c7cfcc1e68